



UNIVERSITÄTS-
BIBLIOTHEK
PADERBORN

Universitätsbibliothek Paderborn

Fasti Mariani Cum Divorvm Elogiis In Singvlos Anni Dies Distribvtis

**Brunner, Andreas
Pfeffer, Wilhelm**

Antverpiæ, 1637

S. Paulus Eremita. 15. Ianuarii.

urn:nbn:de:hbz:466:1-44055

esset ornatus, nisi id dignitatis ex innatâ animi demissione in alium ipse transtulisset, quod eum septem diebus ante se sacris initiatum diceret. Obiit tandem FELIX feliciter, tumulumque templum est nactus; quod cum augustius postea D. Paulinus reddere laboraret, soli que rusticani duo ædes suas transcribere negarent, ecce tibi ignis nocturnus tecta rusticorû depastus amplissimam aream descripsit. Neque hoc solum, sed & alii deinceps miraculis FELIX luxit. *Ex Surio.*

Eò minus in hac peregrinatione deficies, quò veriùs in fontem divinæ misericordiæ per virtutem spei mentis oculos levaveris. Hæc enim virtus claritate suâ Deum nobis manifestat, & inter hostium catervas intrepidè ante faciem Domini nos perducit. B. Laur. Just. Lig. vitæ.

S. PAULUS EREMITA. 15. Januarii.

PAULVS Thebæus xv. annorum adolescens plus Decium, quam eremum horruit. Certè hoc unum imprudens Decius boni fecit, quod ex Christianis eremicolas fecit. Eos inter princeps PAVLVS perhibetur, cui in centesimum usque annum ac decimum spelunca relictum, una eademque arbor palma, & victum, & vestem dedit. Annus agebatur Christianus ccc. xxxiv. cum ad eum divino jussu visit Antonius, atque tunc prudens dispensator corvus, qui annos jam lx. dimensum suum PAVLO quotidie afferre assolebat panem dimidium, hospitis memor duplicavit annonam. Secundum hæc, cum, ita monente PAVLO, vestem sepulturæ allatū iret Antonius, priusquam rediret, abire inter Cælites in cælos amicum videt, reperitque genibus humi adhuc fixum, passisque brachiis

chiis omnino oranti similem. Cùm ultimum proinde officium mortuo præstaret, in eo socios duos leones habuit, qui sepulchrum egestâ humo parârunt, & mœrenti Antonio crebro mœstoque rugitu, & ipsi adgemuerunt. Hinc domum revertit nimium quantum gaudens, spoliis opimis, hoc est tunicâ PAULI è foliis palmæ concinnatâ. Certè non nisi maximis quibusque diebus festis in eâ visus est superbire, ut minus ego jam mirer ab Hieronymo eam palmatæ etiam Imperatorum purpuræ prælatam, quando in illâ magnus Antonius triumphavit. *Ex S. Hieron.*

Quàm deliciosâ fame affligitur, qui caelestis promptuarii dapibus satiatur? cui calum fit cellarium, caelestis promus exhibet ministerium; quàm feliciter miser est, qui dum terrenis eget impendiis angelicis fulcitur obsequiis: cui xenium divinitus mittitur, angelitus ministratur? S. Pet. Dam. serm. 33.

S. JOANNES CALYBITA. 15. Ianuarii.

ILLE JOANNES est, qui in illustri Patriciorum familiâ Romæ natus, parentes piè nos docuit fallere. Nam adolescens admodum clam his in Syriam abiit, & vestem indutus religiosam, unico, sed delicato cibo victitavit, Angelorum pane. Post cùm parentes sæpenumerò ingereret hostis, ægrè illi sibi que facturus Romam iter instituit. Ex itinere vestem suam cum mendicantis centonibus commutat, & his spoliis superbus ad parentes ignotus divertit, tantæque filius familiæ, tanti patrimonii hæres vix malè sartam tectamque in vestibulo ædium suarum casulam impetrat. In hac ille tres annos ad invidiam sui hostis furtivo parentum aspectu fruitur. Hinc ex tuguriolo suo ad
Superum